

Nalinginnaasumik oqaaseqaatit

Siunnersuutip matuma siunertaraa partiit avataasigut qinigassanngortittut qinigassanngortittut nalunaarutigineqarneranni Inatsisartunut qinersivimmi qinersisartut ikinnerpaamik 40-it qinigassanngortitsisutut atsiorsimanissaannik piunasaqaat atorunnaarsinneqassasoq.

Siunnersuutip akuersissutigineqarnerata kingunerisaanik inuit, Inatsisartuni partiit avataasigut qinigassanngortikkumasut, pisariillisaaffigineqassapput.

Aalajangersakkanut ataasiakkaanut oqaaseqaatit

§ 15-imut

Inatsimmi atortuusumi § 15-imi aalajangersagartaqarpoq partiit avataasigut qinigassanngortittunik nalunaarutiginninnermi Inatsisartunut qinersivimmi qinersisartut ikinnerpaamik 40-it, amerlanerpaamillu 50-it, qinigassanngortitsisutut atsiorsimassasut kiisalu qinigassanngortitsisut taakku pillugit paasissutissanik tunniussisoqarnissaanut maleruagassanik.

Allannguutissatut siunnersuutikkut tassuuna aalajangersagaq atorunnaarsinniarnaqarpoq, taamaalilluni qinigassanngortitsisoqarnissaq, partiit avataasigut qinigassanngortittup Qinersisarnermut ataatsimiititamit akuerineqarsinnaanera pillugu, siunissami piunasaqaataajunnaassalluni.

§ 16, imm. 3-mut

Aalajangersakkakkut piunasaqaatigineqarpoq qinersisartoq qinigassanngortittumut ataasiinnarmut qinigassanngortitsisuusinnaasoq. Aammattaaq qinersisartoq qinigassanngortittumut, Inatsisartunut qinersivimmi, qinersisartup nammineq qinersinissamut allattorsimaffimmi ilaaffigisaani, taamaallaat qinigassanngortitsisuusinnaavoq.

Taamaalilluni § 15-imi taaneqartutut qinigassanngortitsisup piunasaqaatit naammassisariaqagai maleruagassakkut erseqqinnerusumik iluarsiivigineqarput. § 15 atorunnaarsinneqarneratigut imaaruppoq, taamaammallu atorunnaarsinneqaqullugu aamma siunnersuutigineqarluni.

§ 17, oqaaseqatigiit aappaat

Aalajangersakkakut oqaatigineqarpoq qinersisartoq, qinigassanngortitsisuunermigut qinigassanngortittumut tapersiisoq, qinigassanngortinnermut nalunaarutip qinersisarnermut siulersuisunut tunniunneqareerneragut, tapersiinerminik tunuartitsisinnaanngitsoq.

Siunnersuutigineqarpoq aalajangersagaq atorunnaarsinneqassasoq, § 15-immi atorunnaarsinneqarnerata kingunerissammagu partiit avataasigut qinigassanngortittunut qinigassanngortitsisoqartarnissaa piumasaqaataajunnaassasoq.

§ 18-imut

Aalajangersakkami pineqarpoq Qinersisarnermut siulersuisut Qinersisarnermut ataatsimiititamut qinigassanngortittunik nalunaarutininik ilisimatitsisussaatitaanerat. Taamatut ilisimatitsisussaatitaanermut ilaatigut ilaavoq qinigassanngortitsisut nalunaarneqarsimanissaat.

Aalajangersakkap oqaasertalerneqarnissaanik siunnersuutitut saqqummiunneqartukut taamatut ilisimatitsisussaatitaanermik aalajangersagaq aalajangiusimaneqarpoq, imaalilluguli; tassunga ilaatinneqaratik qinigassanngortitsisutut akuersissutigineqartut qassiuneri. Taamaalilluni § 11-imi taaneqartutut nalunaaruteqartarnerit pillugit ilisimatitsisuteqartussaaneq allannngortinniarneqalersaanngilaq.